



ИККИ ДАВЛАТ ЎРТАСИДА СТРАТЕГИК ШЕРИКЛИК ВА АМАЛИЙ ҲАМКОРЛИКНИ КЕНГАЙТИРИШ БЎЙИЧА САМАРАЛИ МУЛОҚОТЛАР

Ўзбекистон Республикаси Президенти Шавкат Мирзиёевнинг таклифига биноан Қозоғистон Республикаси Президенти Қосим-Жомарт Тоқаев 5 апрель куни ташриф билан мамлакатимизда бўлди.



Ўзбекистон Марказий Осиё мамлакатлари, жумладан, Қозоғистон билан ўзаро ишонч ва яхши қўшничиликка асосланган муносабатларни ривожлантириш йўлидан бормоқда. Халқларимиз нафақат яқин қўшни, балки қардош сифатида кўп қиррали ҳамкорликнинг барча масалалари бўйича

азалдан бир-бирларини тушуниб, қўллаб-қувватлаб келган. Мамлакатларимиз яхши қўшни ва ўзаро манфаатли ҳамкор сифатида тараққиёт йўлидан елкама-елка бормоқда.

Икки давлат халқаро снэсат масалаларида бир-бирини қўллаб-қувватлаб, халқаро ташкилотлар — БМТ, ШХТ, МДХ, Иқтисодий ҳамкорлик ташкилоти, Ислам ҳамкорлик ташкилоти, Туркий давлатлар ташкилоти, Оролни қутқариш халқаро жамғармаси ва бошқа ташкилотлар доирасида самарали ҳамкорлик қилмоқда. Минтақавий ва халқаро аҳамиятга молик кўплаб масалалар юзасидан томонларнинг позициялари ўхшаш.

Бугунги кунда Ўзбекистонда 1250 дан ортиқ Қозоғистон корхонаси, Қозоғистонда эса ўзбек капитали иштирокида 1400 дан ортиқ компания фаолият кўрсатмоқда. Ўзбекистон — Қозоғистон ҳамкорлигини ривожлантиришнинг устувор йўналишларидан яна бири бу — транспорт коммуникациялари соҳасидир. Мамлакатларимиз автомобиль ва темир йўллари ўзаро интеграциялашган. Ушбу муҳим алоқа тармоғи учинчи давлатлар учун транзит вазифасини ўтапти. 2023 йилда темир йўл транспортида халқаро ташвиш ҳажми 23,46 миллион тонна, автомобиль транспортида 2,1 миллион тонна, ҳаво транспортида эса 90 минг тоннани ташкил этди.

Кўчма Хива шаҳрида Президентлар Шавкат Мирзиёев ва Қосим-Жомарт Тоқаев учрашув ўтказдилар.

Унда Ўзбекистон билан Қозоғистон ўртасидаги стратегик шериклик ва иттифоқчилик муносабатларини янада мустаҳкамлаш, ҳар томонлама амалий ҳамкорликни кенгайтириш масалалари муҳокама қилинди.

Кооперация лойиҳаларини жадаллаштириш, илгари олий даражада эришилган келишувларга мувофиқ инвестиция битимлари ва савдо шартномаларини амалга оширишга алоҳида эътибор қаратилди.

Давлат раҳбарлари машинасозлик, энергетика, транспорт ва логистика, қончилик, тўқимачилик, озиқ-овқат саноати ва бошқа тармоқлардаги қўшма лойиҳаларни илгари суриш юзасидан Бош вазирлар ўринбосарлари, Ҳукуматлараро комиссия ҳузуридаги ишчи гуруҳлар ҳамраисларининг ҳисobotларини тингладилар.

Президентлар товар айирбошлашни кўпайтириш, саноат кооперацияси бўйича узоқ муддатли дастурни шакллантириш ҳамда транспорт ва энергетикада инфратузилмавий лойиҳаларни амалга ошириш бўйича аниқ топшириқ бердилар.

Жорий йилда Саноат кооперацияси халқаро марказини ташкил этиш бўйича амалий ишларни бошлаш, қўшма ташқи савдо компанияси фаолиятини кенгайтириш муҳимлиги таъкидланди.

Гуманитар ва туризм алоқаларини ривожлантириш, ёшлар иштирокида маданият, таълим ва спорт соҳаларида қўшма тадбирлар ўтказиш масалалари атрофида муҳокама қилинди.

Минтақавий аҳамиятга молик масалалар, шу жумладан, сув ресурсларидан оқилона фойдаланиш, Марказий Осиё давлатлари раҳбарларининг Маслаҳат учрашуви доирасидаги ҳамкорликни кенгайтириш ҳамда Афғонистондаги вазиятнинг ривожланиши юзасидан фикр алмашилди.

Икки ва кўп томонлама шаклдаги бўлажак қўшма тадбирлар режаси қўриб чиқилди.

Учрашув ҳар доимгидек очик, самимий ва дўстона муҳитда ўтди.

Президент Шавкат Мирзиёев ва Президент Қосим-Жомарт Тоқаев “Хива ғиламлари” комбинатига ташриф буюрдилар.

2020 йилда ташкил этилган қиймати 24 миллион долларлик ушбу корхона йилгига 4,2 миллион квадрат метр ғилам ва ғилам маҳсулотларини ишлаб чиқаради. Маҳсулотлар АҚШ, Хитой, Россия, Қозоғистон ва МДХнинг бошқа мамлакатларига экспорт қилинмоқда.

Комбинатда Германия, Бельгия, Австрия, Швейцария, Италия, Франция ва Туркиядан келтирилган замонавий ускуналар ўрнатилган. 750 нафар ишчи меҳнат қилмоқда.

Президентлар корхонанинг ишлаб чиқариш жараёни ва шуруми билан танишдилар, комбинат худудида ташкил этилган “Made in Uzbekistan” бренди остидаги маҳсулотлар кўргазмасини кўздан кечирдилар.

Масъул вазирлик ва идораларга ўзаро тажриба алмашиш, кооперация ва савдонинг ривожлантиришга кўрсатма берилди.

Қозоғистон Президенти Қосим-Жомарт Тоқаев давлатимиз раҳбари Шавкат Мирзиёев ҳамроҳлигида қадимги Хиванинг Ичан-қалъа мажмуаси тарихий обидалари ва Нуриллобой саройини зиёрат қилди.

“Очик осмон остидаги музей” сифатида танилган Хива яхлит ёдгорлик сифатида Марказий Осиёда сақланиб қолган ягона шаҳардир. Бу ерда 120 дан ортиқ меъморий обидалар жойлашган.

1990 йилда Хива шаҳри ЮНЕСКОнинг Жаҳон мероси рўйхатига киритилган, 1997 йилда унинг 2500 йиллиги нишонланган. 2020 йилда шаҳар Туркий дунёнинг маданият пойтахти деб эълон қилинди, 2024 йилда эса ислом дунёсининг туризм пойтахти бўлди.

Нуриллобой саройи XX аср бошларида бунёд этилган. Мажмуа мадраса, 100 дан ортиқ хоналар, галерейлардан иборат. Сарой хоналарини безашда нафақат хивалик моҳир усталар, балки чет эллик рассом-декораторлар ҳам иштирок этганлар, улар саройнинг шарқона қиёфасига Европанинг модерн услубини сингдирганлар. Хоналар ички кўриниши, каминлари, Венеция ойналари ва тилла суви югуртирилган бронзадан ишланган, биллур илгакли қандиллари билан ажралиб туради.

Хива тарихи ва унинг фан ривожига қўшган ҳиссаси, шунингдек, худуднинг бой маданияти ва санъати ҳақидаги ҳикоялар қозоғистонлик меҳмонларда катта таассурот қолдирди.

Шу билан Қозоғистон Республикаси Президенти Қосим-Жомарт Тоқаевнинг Ўзбекистонга ташрифи якунланди.

ЎЗА

Халқаро экспертлар фикри

ЎЗБЕКИСТОН ВА ҚОЗОҒИСТОН АЛОҚАЛАРИ

Марказий Осиёдаги вазият барқарорлигига хизмат қилади

Хорижий экспертлар Хивада бўлиб ўтган олий даражадаги Ўзбекистон—Қозоғистон саммити якунлари ҳақида

Ўзбекистон Президенти Шавкат Мирзиёевнинг таклифига биноан Қозоғистон Президенти Қосим-Жомарт Тоқаев 5 апрель куни мамлакатимизга ташриф буюрди. Икки давлат раҳбарларининг қадимий Хива шаҳридаги учрашуви ўзбек ва қозоқ халқларини боғловчи тарихий илдизлар нақадар теран эканининг рамзий ифодаси бўлди.

Ташриф бир кунлик бўлишига қарамай, унинг натижалари мазкур учрашувнинг долзарблиги ва самардорлигини намоён этди. Икки мамлакат етакчилари Ўзбекистон билан Қозоғистон ўртасидаги стратегик шериклик ва иттифоқчилик муносабатларини янада мустаҳкамлаш,

ҳар томонлама амалий ҳамкорликни кенгайтириш масалаларини муҳокама қилдилар.

Ўзбекистон — Қозоғистон саммити ва унинг якунлари хорижий экспертлар томонидан юқори баҳоланмоқда.

➤ Давоми 2-бетда

Янги Ўзбекистон мактаб остонасидан бошланади

НОМ ҚОЗОНГАЙ

бу боғларнинг ҳар гули, ҳар гиёҳи

Жамият ва давлат тараққиёти, эртасининг қандай бўлиши сифатли таълимга боғлиқ. Муваффақият асосини иштиёқ ва ҳаракатдан аввал илм ташкил этади. Азалий қонуният бу: илм-фанга суюнган жамият ва давлат ютказмайди. Мактаблар эса бўлгуси олим, академикларни тайёрлаш ва аниқлашда энг муҳим босқичдир. Юртимизда ҳам таълим тизимига катта эътибор қаратиляпти. Янгидан янги ўқув муассасалари барпо этиляпти, мактаблар таъмирланияпти. “Ўзбекистон — 2030” стратегиясида таълим тизими ислохотлари энг биринчи вазифа этиб белгиланди.

165 битирувчидан 163 нафари талаба бўлди

Айни шу ислохотлар самарасини кўриш мақсадида давлатимиз раҳбари пойтахтимизнинг Юнусобод туманидаги 5-умумтаълим мактабига ташриф буюрди. Мактабда амалга оширилган

ишлар, ўқувчиларнинг таълим олиши, дарс жараёни билан танишди. Бундан ташқари, бугунги кунга келиб, педагогикнинг сифати тушиб бораётганини, бу шарофли касбининг нуфузини тиклаш, уларни моддий рағбатлантиришга ҳаракат қилинаётганини таъкидлади.

➤ Давоми 5-бетда



Ҳаким Йўлдошев олган сурат.

9 апрель — Амир Темур таваллуд топган кун

Соҳибқироннинг СОЛИҚ СИЁСАТИ

бугун ҳам нафақат юртимиз, балки дунё молия амалиётида кенг қўлланади ➤ 6

Дахлдорлик

МАЪРИФАТЛИ ЖАМИЯТ УСТУНИ

Юксак ишончга муносиб бўлиш — олий бурчимиз

Мамлакатимизнинг юксак тараққиётга эришиши пойтахт Тошкент шаҳрини ҳар томонлама замонавий мегаполисга, дунёдаги энг гўзал ва жозибадор шаҳарлардан бирига айлантиришга чамбарчас боғлиқ.

Шу мақсадда Буюк Британия, Сингапур, Хитой ва Туркиядан келган мутахассислар билан Тошкент шаҳрининг 2045 йилгача бўлган бош режаси лойиҳаси ишлаб чиқилди. Тошкент вилоятининг чегарадош туманлари ҳисобидан пойтахт худудини босқичма-

босқич кенгайтириб, Чирчиқ ва Қорасув дарёлари оралигида “Янги Тошкент” лойиҳасини амалга ошириш мақсад қилиб олинди.

➤ Давоми 3-бетда

